



Bersama  
Prof Dr Taufiq  
Yap Yun Hin

# Segala makhluk dicipta sempurna

Allah SWT menciptakan segala-galanya di alam semesta ini dengan ukuran wajar secara kuantitatif dan kualitatif.

Allah SWT menyatakan di dalam al-Quran yang bermaksud: "Sesungguhnya segala yang Kami ciptakan dengan ukuran." (Surah al-Qamar, ayat 49)

Dalam satu lagi firman-Nya bermaksud: "Dan tiap-tiap sesuatu adalah ditetapkan di sisi-Nya dengan kadar yang tertentu." (Surah Ar-Ra'd, ayat 8)

Di alam semesta ini juga wujud kepelbagaian dalam rupa bentuk dan fungsi. Dengan kepelbagaian elemen itu dapat memenuhi keperluan manusia.

Tidak ada yang Dia ciptakan itu melainkan untuk meraikan serta menyatakan puji-pujian ke atas-Nya.

Firman Allah SWT yang bermaksud: "Tidaklah engkau mengetahui engkau bahawasanya Allah (Yang Maha Esa dan Maha Kuasa) sentiasa bertasbih kepada-Nya sekalian makhluk yang ada di langit dan di bumi serta burung-burung yang terbang berbaris di angkasa? Masing-masing sedia mengetahui (menurut keadaan semula jadinya) akan cara mengerjakan ibadatnya kepada Allah dan memuji-Nya dan Allah Maha Mengetahui akan apa yang mereka lakukan." (Surah an Nur, ayat 41)

Setiap benda diciptakan Allah memperlihatkan tanda menakjubkan

dengan penuh makna. Dia juga menunjukkan kemuliaan, keagungan dan kebijaksanaan-Nya.

Allah SWT berfirman yang bermaksud: "(Dialah Tuhan) yang menjadikan bumi bagi kamu sebagai

hamparan dan Dia mengadakan bagi kamu padanya jalan-jalan lalu-lalang dan Ia juga menurunkan hujan dari langit. Maka Kami keluarkan dengannya berjenis-jenis tanaman dan buah-buahan yang berlainan keadaannya. Makanlah kamu daripadanya dan berilah makan binatang-binatang ternak kamu, sesungguhnya semuanya

itu mengandungi tanda-tanda yang membuktikan kemurahan Allah bagi orang-orang yang berakal fikiran." (Surah Taha, ayat 53-54)

Allah SWT tidak menciptakan apa-apa yang ada di alam semesta ini sia-sia, tanpa kebijaksanaan, nilai dan tujuan.

Dalam firman-Nya yang bermaksud: "Dan tidaklah

Kami menciptakan langit dan bumi serta segala yang ada di antara kedua-duanya secara main-main. Tidaklah Kami menciptakan kedua-duanya (serta segala yang ada di antaranya) melainkan kerana menzahirkan

perkara-perkara yang benar, akan tetapi kebanyakan mereka tidak mengetahui (hakikat itu)." (Surah ad-Dukhaan, ayat 38-39)

Oleh itu, pada pandangan Islam, alam semesta ini mempunyai nilai. Segala benda yang ada di alam semesta ini diciptakan untuk taat kepada Allah SWT Yang Satu.

Dialah juga yang mengawal kitaran kehidupan dan kematian seluruh makhluk-Nya. Firman Allah yang bermaksud: "Sesungguhnya Allah jualah yang membelah (menumbuhkan) butir (tumbuh-tumbuhan) dan biji (buah-buahan). Ia mengeluarkan yang hidup daripada yang mati dan mengeluarkan yang mati daripada yang hidup.

Yang sedemikian itu kekuasaannya ialah Allah. Maka bagaimanakah kamu dipalingkan daripada menyembah-Nya (oleh benda-benda yang kamu jadikan sekutu-Nya)?" (Surah al-An'aam, ayat 95)

Kehidupan dan kematian juga adalah ciptaan Allah. Firman Allah SWT yang bermaksud: "Dialah yang mentakdirkan adanya mati dan hidup (kamu) untuk menguji dan menzahirkan keadaan kamu: Siapakah di antara kamu yang lebih baik amalnya dan Ia Maha Kuasa (membalas amal kamu), lagi Maha Pengampun (bagi orang-orang yang bertaubat)." (Surah al-Mulk, ayat 2)

**Penulis ialah Presiden Persatuan Cina Muslim Malaysia (MACMA) dan profesor di Universiti Putra Malaysia (UPM)**

